

### Samsa-masjien.

Willem Anker. Pretoria: Protea Boekhuis, 2015. 92 pp. ISBN: 978-1-4853-0256-8. (gedrukte boek).

DOI: <http://dx.doi.org/10.4314/tvl.v.53i1.17>

Willem Anker is tot op hede die skrywer van twee gepubliseerde dramas en twee romans. Sy drama *Slaghuis* en die roman *Siegfried* het in 2007 verskyn, terwyl die drama *Skrapnel* in 2011 en die omvangryke grensroman *Buys* in 2014 gepubliseer is. Soos hul titels suggereer, is 'n raakpunt tussen *Slaghuis* en *Skrapnel* voorstellings van brute, bloedige geweld.

*Samsa-masjien* bied nie voorstellings van geweld nie, maar sluit eerder by 'n verdere kenmerk van vernuwing in die postapartheid letterkunde aan wat ná 2000 verskyn het. Volgens Brink "raak 'n mens [in hierdie werke, JC] dadelik bewus van 'n beweging na binne". Hy beskryf dié "beweging" in die eerste Jan Rabie/Marjorie Wallace Gedenklesing in 2010 as 'n "proses weg van die bloot sosiale toneel na die menslike en individuele aard van dit wat vertel word".

In *Samsa-masjien* neem die "beweging na binne" die vorm van 'n soektog na antwoorde op die vraag wat 'n mens is as hy iets anders as 'n mens word. Reeds die titel, waarin die eienaam "Samsa" opgeneem is, verrai die feit dat hierdie soektog deur Kafka se verhaal *Die Verwandlung* (Die metamorfose) geïnspireer is. Soos in ander Kafka-verhale, onder andere *Ein Bericht an eine Akademie* ('n Verslag [deur 'n bobbejaan, JC] aan 'n Akademie) of *Forschungen eines Hundes* (Ondersoeke van 'n hond), bepaal

transformasie die handelingsverloop in *Samsa-masjien*.

Alhoewel Anker en Kafka se hoofkarakter en dogter, Gregor en Grete, dieselfde name het, stem die handelingsverloop in *Samsa-masjien* nie met Kafka se werk ooreen nie. Verder is die ander karakters in *Samsa-masjien* nie sonder meer uit Kafka se *Die Verwandlung* oorgeneem nie. So is daar in *Samsa-masjien* duidelike raakpunte tussen die voorstelling en optrede van Gregor se ewe bejaarde vrou Josefina met die karakter Josefina in Kafka se verhaal "Josefine, die Sangerin oder das Volk der Mäuse".

Kafka se Gregor word een oggend na 'n onrustige nagrus wakker om te ontdek dat hy oornag in 'n insek verander het. Daarteenoor begin Anker se drama wanneer Grete vir Gregor en Josefina op grond van hul ouderdom en Gregor se optrede in haar huis opneem. Gregor sien oral denkbeeldige insekte en praat en speel met hulle. Vir sy dogter is die ontstellendste egter dat hy hom toenemend na die kelder terugtrek waar hy en Josefina 'n "geraasmasjien" bou, sy bedenklik op 'n viool speel en altwee uiterlik vuiler word, byna soos die "stereotipiese" opvatting wat mense het dat insekte vuil is. Die klimaks breek aan wanneer Grete en Tjaart 'n kliënt aan huis onthaal met die doel om 'n kontrak vir die bemarking van 'n handewastoestel te bekom.

Die geraasmasjien of *intonarumori* (Italiaans vir "geraasmaker", vergelyk Wikipedia en ongenommerde bladsy 10 van die drama) speel 'n sentrale rol in die skep van 'n tekstuele en toneelmatige diskoers oor waar die grense van menswees

lê. Net soos Kafka se Gregor tot 'n insek met 'n menslike bewussyn transformeer maar die vermoë verloor om in menslike taal te kommunikeer, transformeer Anker se Gregor tot 'n geraasmasjien maar met 'n bewussyn wat die leser of gehoor hoogstens as post- of transmieslik sou kon herken. As karakter teken Samsa-as-masjien toenemend in die taal van geraas protes teen verskeie sake aan en steek daardeur die grens van menslike kommunikasie oor. Namate sy protes toeneem, word die geluide uit die kelder, wat musiek en stemopnames insluit, al harder.

Dit is opvallend dat Samsa-as-masjien se protes dikwels in die vorm van 'n inversie van die verhouding tussen betekenaar en betekenis voorkom. In plaas daarvan om woorde met verskillende, maar vaste, betekenisonderskeidings in Gregor se dialoog te gebruik, keer die dramaturg die proses van betekenisgewing op strategiese plekke om. Een van die motto's aan die begin van die teks, naamlik die vraag "[i]s dit nie eerstens deur die stem wat ons hier word nie?" sluit by hierdie inversiewe gebruik van dialoog aan.

Voorbeelde van protes in geraastal sluit Gregor se openingsgesprek met 'n kakkerlak ("Blat-tar-i-aa, Blat-tod-ee-aa") in, asook Josefina se onverkwiklike vioolspel waarna niemand anders behalwe Gregor wil luister nie, die verhouding tussen kinders en ouers waar kinders vir hul bejaarde ouers sorg en nie omgekeerd nie, Gregor se regressie tot kindwees as gevolg van die demensie waaraan hy ly, of die indringing van waardes van buite die huis ter wille van

die verkryging van finansiële voordele. 'n Voorbeeld van laasgenoemde is Charlené en haar man wat binne die valse intimiteit van Grete-hulle se huislike kring onthaal word ten einde 'n waardevolle kontrak te bekom. Alhoewel dié toneel dalk effe te uitgerek is, is die clichés wat Grete en Tjaart tydens die ete van kaartjies aflees, 'n hoogtepunt van inversie. Die trefkrag van dié toneel setel daarin dat Charlené en haar man afwesige karakters is, met ander woorde nie op die verhoog verskyn nie.

*Samsa-masjien* is uiteindelik veel meer as "'n kopknik na Kafka se klassieke verhaal", soos op die agterbuiteblad van die gepubliseerde drama beweer word. Kafka se hele oeuvre, die (geraas)masjien waarna die titel verwys, sy sosiale en politieke posisie as 'n Jood wat in Duits skryf in 'n omgewing (die stad Praag) waar die omgangstal Tsjeeggies is, en die representasie van demensie, maak van hierdie dramateks 'n waardige en vernuwende toevoeging tot die Afrikaanse drama ná 2000. Foto's van die stel en die insluiting van byklanke in die vorm van 'n CD verhoog toeganklikheid tot die teks en bied rigtingwysers vir verdere, onder andere Jungiaanse, interpretasies daarvan.

#### Geraadpleegde bronne

Brink, A. 2011. "Ground Zero: Die Suid-Afrikaanse literêre landskap ná apartheid." (Jan Rabie/Marjorie Wallace Gedenklesing, Universiteit van die Wes-Kaap, 17 September 2010). *Werkwinkel*, 6.1. (2011): 9–22.

Wikipedia. 2015. "Intonarumori." 13 Nov. 2015. <<https://en.wikipedia.org/wiki/Intonarumori>>.

Johan Coetser  
coetsj@vodamail.co.za  
Universiteit van Suid-Afrika, Pretoria